

ያህይ ከተሶሃ ዋኔ ሶህኑተ ኣጉሰ

ዋዕኔ አሳባቕ ያህይ ሶህኑት ለሙ ቡዕላ እኮ ጠዉ ዮሰ። ሁኩንን ካን እነበባእሩ መገኒንለክ ቤቶሃሰ መሲህ ኢሰን ሜጦመት ሄኑሰተ ጠረኝሲሃለክ ከ ሜጦመተ ቤሶተ አታለኖ ክህብ ትምርቲቕ አገዕርቶታት። ህከ ወክት ኬዕዮ ክዝብ ትምርቱ አሜተኖሁ ከን ኣዲንያ ጠዊቕ እኮቤቺሃ መገን ቤቱ ኢሰ ሆሮን መንቹ እሆተ አታለኖበኣ ዮኖሃን እቅ። ሁኩ አሰተማረት «ጡሙ ዩ ኣዲንያ ጠዊሃ ጨነቀሙ አጉሩ ዩሃን» ይታ እቅ። ከኒንን በርግት «ጡመ ጠወ አኡለክ ዋሎ መኒሃ ኢተተ ለሊሱ ጡሞን ሜጡ ደቀንሹ ዮሰበኣ» ይታ እቅ።

ከተሶሲሁ ከ ትምርት ቶጉ ግብ መሲህ ኢሰ መነ ጡምሶተ ይ መንቹ እኮኡ፤ ኢሳን አመዕንታእሩለክ መገኑ ኢትታእሩ ጉዕሙንኩ ገገዉንኩሰ ኢተቀሙ ሀሰሰኖሰ ዮን ኩሎኡ።

መጻፉሰ አፎሃ

ኣጉሰ (1፡1-4)

ኑርለክ ቱንሰቹ (1፡5—2፡29)

መገን ኑሱተለክ እልቢሰ ኑሱተ (3፡1-24)

ሀንቅለክ ክዝብ (4፡1-6)

ኢተት ግደ እሁሰ (4፡7-21)

ድሉ ዮሰ አመዕነቱ (5፡1-21)

ሄእ ላገተ

¹ ክልቀቲቕ ብርተ ዮ ሄእ ላገተኔ ሞጮጮኖሚሃ፤ እሌንተኔ ለዕኖሚሃ፤ አጥራመንት ለዕኖሚሃለክ አንጋንከኔ አንፎሚሃ ኩልኖንክዕኔ።

² ኩ ሄኡ ለልዮኡ፤ ነኡን ለዕኖም፤ መሰከርኖም፤ ከኒቕ ብርተ አናከኔ መገን ቤቸን ዮኢሃለክ ኔሳሃ ለሌኢሃ ዘላለሚሃ ሄኣኖ ሄእተኔሃ ኩልኖንክዕኔ።

3 ኒን ሜጡበ ማጠመት ሄኦህዕኔተ ለዕኖሚሃለክ ሞጮጭኖሚሃ ክዕኔንከ ኩልናንክዕኔ፤ ኒ ማጠመት እነ መገኒትለክ ቤትንከሰ መሲህ ኢሰን ማጡባት።

4 መጎዲኦኔ ዊመ እኮተ ካን ከተንባንክዕኔ። *

መገኑ ኑር እሁስ

5 ኢሲች ሞጮጭኖሚሁለክ ክዕኔሃ ኩልናም ሶህኑት ተኒት «መገኑ ኑር እኮቤቺሃ እሰቤችን ቱንሰቺ ሆርን ዮበእ» ይታእተ።

6 ህካን እኮቤቺሃ «መገኒን ማጠመት ዮኔ» ይነን ቱንሰቺ ኣዜን ሄዕኖም ጎሬ ክዘምባሚት ቤሉ ሀንቅን ሄዕኖምበእ ዩሃን።

7 ጠዉ እኮጎሬ እሰ ኑሬን ሄዕዮገን ነኡ ኑሬን ሄዕኖም ጎሬ ገገዉንኩኔ ማጠመት ሄኦኔ፤ ህትን ቤትሰ ኢሰ ቄጉ ጨብች ጉዕሚችን ነጠ አኦኖ።

8 ህካን እኮቤቺሃ ነኡ «ጨቡ ዮኔበእ» ይኖምጎሬ ገዉኔ ለሰንሳሚት ቤሉ ሀንቁ ኒ ኣዜን ዮበእ።

9 ህትን ጨብኔ መገኒሃ ኩልኖሚች መገኑ አመዕነሞሃለክ ፈዩ እኮቤቺሃ ጨብኔ ጉዕመንከ «ፈቁን» ዮኖ፤ ህትን ጨብችኔ ጉዕሚችን ነጠ አኦኖ።

10 ነኡን «ጨብ እዕኖምበእ» ይኖሚሃ እንኮምጎሬ መገኑ ክዘበኛ አዕናምት፤ ህትን መገን ላገንት ኒ ኣዜን ዮበእ።

2

መሲህ ጠበቀኔ እሁስ

1 ኢ ኦሶ! ካን ከተባንክዕኔሁ ጨብ አቲነንተበእገደህት፤ ጠዉ እኮጎሬ ሀኩ መንቺሁ ጨብ አዕዮ ጎሬ አናኔ መገን ቤችን ጠበቁ ዮኔ፤ እሰን ፈዩ መሲህ ኢሳት።

2 ኒ ጨብተኔሃ ኦርሸተ ቶጎሁ እሶት፤ ህትን ኒ ጨብ ጠለዕለ አሁዕን ኣዲንያ አሉን ሄኦኖ መኒሃ ጉዕሚንካንት።

3 አዘዢሃ አገርኖምጎሬ መገኑ ደንጋምገ እሲን አጥራመንታም።

4 «እን መገኑ ደጋም» ዮን እሰ አዘዢሃ አገርቡ መንቺ ክዘበኛ ቤሉ ሀንቁ እሰ ኣዜን ዮበእ።

5 ጠዉ እኮጎሬ መገን ላጋተ አዘዘመኖሁ ጉዕመንኩ መገኒሃ ዮሰ ኢተት ዊመሃን፤ ሀንቅንከ እሲን ሄኦኔ ደገመኖሁ ከኒንት።

6 አዩሁ «መገኒን ማጡበ ሄኦም» ዮኖሁ መሲህ ሄዕዮገ እክ ሄኡ ሀሰሰኖሰ።

* 1:4 መጎዲኦኔ፦ መት.መቼ ሉህ ክታበት «መጎዲኦክዕኔ» ይታእተ። 1:7 ያህ. 13፥34። 2:1 ያህ. 1፥12።

ሃዕሮ ትዛዝ

⁷ ኢ ጃላ! ኩ ከተባንክዕኔ ትዛዙ ዋዕኔችን ኬሽ ዮኣሃ ትዛዝ ቤሉ ሃዕሮሃ ትዛዝበኣ፤ ኩን ዋዕኔችን ጀመር ዮ ትዛዝ ሄጭቲን ሞጮጭቲንታእተ ላገ።

⁸ እሁን ቤሉ መሲሂንለከ ክዕኔ ሩሂን ሀንቅ እኮሃ ሃዕሮ ትዛዝ ከተባንክዕኔ፤ መሰንትሰ ቱንሰቹ ህገኖት ቲሁ ሀንቅ ኑሩ ለሊሰኖት።

⁹ እዪሁ «ኑሬን ሄኣሞት» ዮን አመሰቤቱ ግበኖሁ ቲሱ ኢሊ ቱንሰቹን ሄኣኖት።

¹⁰ አመሰቤቱ ኢተኖሁ ኑር ኣዜን ሄኣኖ፤ ህካን እኮቤቹሃ እሲን መነ ቆል ሉሰሰኖርቹ ዮበኣ።

¹¹ ጠው እኮጎሬ አመሰቤቱ ግበኖሁ ቱንሰቹ ኣዜን ሄኣኖ፤ ቱንሰቹ ኣዜንን ፈንቀለመኖ፤ ቱንሰቹንኩ አልሰ ቆቅሾቤቹሃ ኦርኣኖቤቹሃ ደገኖበኣ።

¹² ኢ ኦሶ! ጨቡክዕኔ ኢሰ ሱዕሚን አጉረሞህዕኔቤቹሃ ከተባንክዕኔ።

¹³ አናከ! ዋዕኔች ሄዕዮሃ ላገሰ ደገነንተቤቹሃ ከተባንክዕኔ፤ ወደላ! ሼይጣን ቁልቲንተቤቹሃ ከተባንክዕኔት፤

¹⁴ ኦሶ! መገኑ ደገነንተቤቹሃ ከተባንክዕኔ፤ አናከ! ወዕናንከ ሄጭ ዮኢሃ ላገሰ ደገነንተቤቹሃ ከተባንክዕኔ፤ ወደላ! ጠረኝ እኬንተቤቹሃለከ መገን ላገት ቀልቤንከክዕኔ ሄኣቤቹሃለከ ሼይጣን ቁልቲንተቤቹሃ ከተባንክዕኔ።

¹⁵ ኣዱንያ አል ህከረንገ ኣዱንያ አሌን ዮ ሂለ ጠወ ኢትቶኖቹ፤ ኣዱንያ አል ኢተኖሁ አና መገኑ ኢተኖበኣ።

¹⁶ ኣዱንያ አሌን ዮኢሁ ጉዕሙንኩ ማል ሄዕላቸተ፥ እሌ ተሸት፥ ቀባጦን ድከኡ ኣዱንያ አልቶቤሉ አና መገን ኣዱቶበኣ።

¹⁷ ዱንያ አሉለከ ሄዕላቸት ህጋኣ፤ ጠው እኮጎሬ መገኑ ዮኖሃ አኣኖሁ ጉዕሙ ዘላለሚሃ ሄኣኖ።

መሲህ ግባህኡች አገዕርዬ

¹⁸ ኢ ኦሶ! ኩን መጨረሽሃ ወክት፤ መጨረሽ ወክቲን «መሲህ ግባኖሁ አሜተኖ» ዬኖሃ ሞጮጭቲንተገን ቲሁ ልግቡ መሲህ ግባሩ አሜተኡ፤ ሁኩንን መጨረሽ ወክት እሁሰ ደንጋም።

¹⁹ እሰን ፋልቶኢሁ ኒ በልቹት፤ ጠው እኮጎሬ እሰን ኒረበኣ፤ እሰን ኒረ እኮ እቃኔተ ኒን ሜጡብ ጠረኝት ሄኣ እቅ፤ ጠው እኮጎሬ እሰ ጉዕሙንኩሰ ኒረ እሁ ሆጉሰ ደገሞተ ኒ በሊች አደ እክ ፋልቶኡ።

²⁰ መገን ጠሊለ እኮ መሲሁ ክዕኔተ ጠሊለ አያኒን ቡርህዕኔ፤ ህካን እኮቤቹሃ ጉዕሙንኩክዕኔ ሀንቅ ደገነንተ።

21 እን ከተባንክዕኔሁ ሀንቅ ደገነንተበእረ እኬንተቤቺሃ እሁዕናን ሀንቅ ደገነንተረለክ ሀንቅ ኣዚች ክዘቡ ፋለናበእገ ደገነንተቤቺሃት።

22 ኢሰ «መሲሂበእ» ይ ለገእኖህን ቤሉ ክዘበኙ አይ ዮኡ? ህትን እነ መገኑለክ ቤቱ ለገእኖሁ እሰ መሲህ ግበኖሃን።

23 ቤቱ ለገእኖህኒሃ ጉዕሚንከ እኑ መገኑ ዮሰበእ፤ ህትን እን ቤቲንከሰ አመዕናም ይ መሰከረኖህኒሃ እኑ መገኑ ዮሰ።

24 ህካን እኮቤቺሃ አዕኑ ዎዕኔችን ሞጮጭቴንታሁ ክዕኔ ኣዜን ጠረኝ ሄኤን፤ ዎዕነ ሞጮጭቴንታሁ ክዕኔ ኣዜን ጠረኝ ሄዕዮ ጎሬ አዕኑ እነ መገኒንለክ ቤቲን ሜጡብ እኬን ሄኤነንተ።

25 ኩን እሰ ኣሴኔ ተብሳሃን፤ ሁኩንን ዘላለምየ ሄኤ።

26 ካን እን ክዕኔተ ሉሰሳህዕኔ መንተኔሃ ከተባሚት።

27 ጠዉ እኮጎሬ እሰች ኣእቲንተ ጠሊሉ አያኑ ኣዜንከክዕኔ ዮቤቺሃ ዎሉ አሰተማርቺ ሀሰሰኖህዕኔበእ፤ እሰ ጉዕመርቺንከ ተማርሰኖህዕኔ፤ እሰ ተማርሰኖህዕኔሁ ሀንቅየ ቤሉ ክዘብሃበእ፤ ህካን እኮቤቺሃ እሰ ተማርሰኖህዕኔ ሃሊን መሲህን ጠረኝቲን ሄዕዩ።

28 ቲሁ ኢ ኦሶ! ኢሰ አሚተኖ በር ዋጅናምበእገለክ ሙልናበእገ እሶን ሄዕዩ።

29 መሲህ ፈየ እሁሰ ደገነታች ፈይመተ አእኖሁ ጉዕሙንኩ መገኒች አለሞሃ እሁሰ ደገነንተ።

3

መገን ኦሱተ

1 «መገን ኦሱተ» የመም ገእሞተ እኑ መገኑኔ ኣሴኔ ኢተት ሄንከ ጎሬ ለዕዩ፤ ህትን ሀንቅንከ ነኡ መገንተ እለ፤ ህካን እኮቤቺሃ ኣዲንያ አል መኑ መገኑ ደገ ሆጎቤቺሃ ኔሳሃ ደጋኔበእ።

2 ኢ ኢተት! ቲሱ ነኡ መገንተ ኦሱ፤ ኤተሮንከሰ መ እንካም ጎሬ ደንጎምበእ፤ ጠው እኮጎሬ ኢሰ አሜቾ ወክት እሱ ገዉንከሰ ለዕናምቤቺሃ እሱ አጉንዳምገ ደንጋም።

3 ኩን እሁሰ መሲህ ተብሳሃ አእኖሁ ጉዕሙንኩ መሲህ ነጠ እኮገን እሰ ገዉሰ ነጠ አእኖ።

4 ጨብ አእኖሁ ጉዕሙንኩ መገን ሕገ ድጀኖ፤ መሰንትሰ ጨቡ ገዉንኩሰ መገን ሕገ ድጂሃን።

5 መሲህ መን ጨብ ቤሶተ አሜቾገ ደገነንተ፤ ህትን እሲን ጨቡ ዮበእ።

6 እሲን ጠረጴሂ ሄደሁ ጉዕሙንኩ ጨብ አላን ሄደኛለኝ፤ ጨብ አደሁ ጉዕሙንኩ መሲህ ለዕዮበኦ ህከረንገ ደንበኤ።

7 ኢ ኦሶ! አዲሁ ጣንሱንከህዕኔ፤ መሲህ ፈየ እኩን ፈይመ ሆጉት አደሁ ጉዕሙንኩ ፈየሃን።

8 እብልሱ ዋዕኔችን ኬሽ ጨብ አደላቸውን ጨብ አደሁ ጉዕሙንኩ እብልሰ አዲቸት፤ ህካን እኮቤቸውን እብልሰ ሆጉት ቤሶት መገን ቤቱ አሜችኤ።

9 መገን ኦሱት አኩሩ ጉዕሙንኩ ጨብ አቶት አታልታበኤ፤ መሰንትሰ መገን ሃለቱ እሰ አዜን ሄደላቸውንትለከ መገኒች ከለቀንቶቤቸውንት።

10 መገን ኦሱትለከ እብልሰ ኦሱት ከኒን አደ እክ ለልታኤ፤ ፈይመ ሆጉት አላባሁለከ አመሰቤቱ ኢትባሁ መገንያ ቤቱበኤ።

ገገዉኔ ኢትቀምተኔሃ

11 ዋዕኔችን ጀመርቴን ሞጮጭቴንት ሶህኑት «ገገዉኔ ኢትቀም» ይታእታን።

12 ሸይጣን አድረ እንክ አመሰቤቱ ሼ ቃኤሌ እንኩንከ፤ እሰ አመሰቤቱ ሼኢሁ ሚሃት? ሆጉሰ ሂለ እኮቤቸውን አመሰ ቤት ሆጉት ጡመ እኮቤቸውንበእንዶ?

13 ህካን እኮቤቸውን አመኤ ኦሶ! አዲንያ አሉ ግቦህኒገሬ አጀብሰጭቶኖቹ።

14 ነኡ አመኔኦሱት ኢትቀምቤቸውን ሬሆች ሄኦን ሀጉኔ ደንጋም፤ ጠው እኮጎሬ አመሰቤቱ ኢትባሁ ሬሆ አዜን ሄደኛ።

15 ህትን አመሰቤቱ ግብኖሁ ጉዕሙንኩ ነብሳሃ ሸዮእሃን፤ ነብሳሃ ሸኖሀኒሃ ጉዕሚንከ ዘላለሚሃ ሄደኛ ሄኡ ዮሰበእገ ደገኒንት።

16 ኢትት መሃጎር ደንጋሚሁ መሲህ ኢሰ ኔሳሃ ነብሳሰ ህግሽ አሴቤቸውንት፤ ህካን እኮቤቸውን ነኡን አመኔ ኦሶት ነብሳኔ ህግንሰ ኦሱ ሀሰሰኖኔ።

17 ጠዉ እኮጎሬ ከን አዲንያ አል ቀባጡት ዮሰ መንቹ ኦርሻሙ አመሰቤቱ ለዕይ አሙዝበሰ ጎሬ መገን ኢትት ዮኤ ዮት ሀት እክ አታለኛ።

18 ኢ ኦሶ! ሆጎንለከ ሀንቂን ኢትቀሙን ቤሉ ጠለዕል አፎንለከ ላጋን ኢትቀሙንከ።

መገን ብሬን ዮኔ አመዕነንሹ

19 ህካን እኮቤቸውን ሀንቅ መን እሁኔ መገን ብሬን ዋጂ ዮበኢሃ መለልን ሆንጠንኮት አታልናምገ ደንጋም።

20 ቀልቡኔ ሂላ ሆጎተኔ ዋቀሰኖሃ እኮች መገኑ ቀልቢችኔ ሎረ እኮቤቼሃ ጉዕመንከ ጠወ ደገኖገ ደንጋም።

21 ኢ ጃላ! ቀልቡኔ ዋቀሰበኔሃ እኮች መገን ብሬን ሙልናምበኦ።

22 ህትን ነኡ መገን ትዛዝ አገርናምቤቼሃለከ እሱ ሙንዲሲሰኖርቼ አዕናምቤቼሃ ኡጭናምርቼ ጉዕመንከ እሲች ደእናም።

23 መገን ትዛዙ ቤትንከሰ መሲህ ኢሰ ሱዕሚን አመዕንናምገለከ መገኑ አዘዡንገን ገገዉኔ ኢተቀማምጋት።

24 ትዛዝሰ አገረኖሁ ጉዕሙንኩ መገኒን ሄአኖ፤ ህትን መገኑሁ እሰ ኣዜን ሄአኖ፤ ህካን እኮቤቼሃ መገኑ ኒ ኣዜን ሄኡሰ ደንጋሚሁ እሰ ኣሴኔ አያኒንት።

4

ሀንቅ አያንተኔሃለከ ክዝብ አያንተኔሃ

1 ኢ ጃላ! አያኑ ጉዕሙንኩ መገኒሃ እሁሰለከ መገኒሃ እሁ ሆጉሲ አጥረመቼ ቤሉ አያነ ጉዕመንከ አመዕንቶኖቼ፤ መሰንትሰ ኣዲንያ አሌን ልግቡ ክዝብ ነብያኑት ኬኦኡ።

2 መገን አያነ እሁሰ አደ አቴን ደገኒንታሁ ከኒንት፤ «መሲህ ኢሰ መንቼ እክ አሜቸኡ» ይ አመዕን ኩለኖሁ ጉዕሙንኩ መገንየ አያነ።

3 ጠው እኮጎሬ መሲህ ኢሰ ኒገን መንቼ እክ አሜቸበኦ የኖ አያኑ ጉዕሙንኩ መገንየ አያነበኦ፤ «ህትናሙ አያኑ አሜተኖ» ዬንን ሞጮጭቴንታሁ መሲህን ኢተቀምባሃ አያነ፤ እሰ ቴሁ ኣዲንያ አሌን ዮኡ።

4 ኢ ኦሶ! አዕኑ መገንረ፤ ክዕኔን ዮ መገኑ ከን ኣዲንያ አሌን ዮሀኒች በተአኖቤቼሃ ክዝብ ነብያከተ ቄልቴንታኦ።

5 እሰ ከን ኣዲንያ አል መነ እኮቤቼሃ ከን ኣዲንያ አል ጠወ ጠለዕል ጠወኣኦ፤ ህካን እኮቤቼሃ ከን ኣዲንያ አሌን ሄአኖ መኑ ሞጮጬኖሰ።

6 ነኡ መገንረ እንኮምቤቼሃ መገኑ ደገኖሁ ጉዕሙንኩ ሞጮጬኖኔ፤ እኮጎሬ መገኒች እህባሁ ሞጮጬኖኔበኦ፤ ህካን እኮቤቼሃ ሀንቅ አያነለከ ክዝብ አያነ ከኒን ደንጋም።

መገኑ ኢተታን

7 ኢ ጃላ! ኢተት መገኒች እኮቤቼሃ ገገዉኔ ኢተቀሞ፤ ኢተቀመኖሁ ጉዕሙንኩ መገኒች እለሞእሃን፤ ህትን መገኑሃ ደገኖ።

8 መገኑ ኢተተ እኮቤቹሃ መነ ኢትባሁ ጉዕሙንኩ መገኑ ደገኖበአ።

9 ቤቲሰ አዲን ሄኡ ደእኖተ መገኑ ሜጡ ቤቱሰ ኣዲንያ አል ሶኮኡ፤ ህካን እኮቤቹሃ መገን ኢተተ ሄንካጎሬ ለልዮኔ።

10 ኢተተ ዩ ህትጎታን፤ ነኡ መገኑ ኢትናምቤቹሃ እሁዕናን መገኑ ኢቱኔቤቹሃትለከ ቅጣትኔ ኣኦተ ቤቱሰ ሶኮኔቤቹሃት።

11 ኢ ጆለ! መገኑ ህት ኢቱኔሃ እኮቹ ገገዉንኩኔ ኢተቀሙ ሀሰሰኖ።

12 መገኑ ለእዮ መንቹ አዪሁ ዮበአ፤ ገገዉንኩኔ ኢተቀሞም ጎሬ መገኑ ኒ ኣዜን ሄእኖ፤ ህትን እሰ ኢተተ ኒ ኣዜን ዊመ እክ ሄእአ።

13 መገኑ አያሰ ኔሳሃ ኣሴኔቤቹሃ እሲን ሄዕናምገ እሰን ኒን ሄእኖገ ህከኒን ደንጋም።

14 አኑ መገኑ ቤቱሰ ኣዲንያ አልሃ መነ ጡምሶተ ሶሁሰ ለዕኖሚሃ መሰከርናም።

15 ኢሰ መገንዩ ቤቱ ይ መሰከረኖ መንቹን ጉዕማንን መገኑ ሄእኖ፤ ህትን እሰን መገኒን ሄእኖ።

16 ህከን እኮቤቹሃ መገኑ ኔሳሃ ኢቱሰ ደንጋም፤ አመዕንናም። መገኑንኩ ኢተታን፤ ኢታን ሄእኖሁ መገኖን ሄእኖ፤ ህትን መገኑንኩ እሲን ሄእኖ።

17 ከን ኣዲንያ አሊን መሲህ ሄዕዮገ ሄዕኖም ጎሬ ኢተተ ኒን ዊመ እካአ፤ ህካን እኮቤቹሃ ፍርድ በር ብርሰ ዋጅኑዕነ ሆንጠንኮተ አታልናም።

18 ሀንቅ ኢተተ ዋጂ ፋሽት ኡጅታ ቤሉ ኢታን ዋጂ ዮበአ፤ ዋጂ ቅጣቲን ሜጡበ እክ ዮቤቹሃ ዋጅኖ መንቹ ኢተተ ዊመተበአ።

19 መገኑ ኔሳሃ ሄጭ ኢቱኔቤቹሃ ነኡን ኢትናም።

20 አዪሁ «መገኑ ኢታም» ዩን አመሰቤቱ ግበኖሁ ክዝበኛን፤ ለዕዮ አመሰቤቱ ኢትባሁ ለእበ መገኑ ኢቶተ አታለኖበአ።

21 ህካን እኮቤቹሃ መሲህ ኣሴኔ ትዛዙ መገኑ ኢተኖሁ አመሰቤቱሃ ኢቱን ዮኖሃን።

5

ኣዲንያ አል ሂለርቹ ቄሉ

1 ኢሰ መሲህ እሁሰ አመዕነኖሁ ጉዕሙንኩ መገኒቶ አለሞእሃን፤ አዪሁ እን መገኑ ኢተኖሁ ጉዕሙንኩ ቤቱሲ ኢተኖ።

2 መገን ኦሱተ ኢቱኔ ደንጋሚሁ መገኑ ኢትናምጎሬትለከ ትዛዝሰ አገርኖምጎሬት።

3 መገኘት ኢትናም ዩ ትዛዝስ አገሩሃን፤ ህትን ትዛዘንኩስ ኬዕምበሃን።

4 መሰንተሰ መገኒች እኩሁ ጉዕሙንኩ ኣዱንያ አል ቁለኖ፤ ኣዱንያ አል ቁልናሚንኩ አመዕነቲንት።

5 ኢስ መገን ቤቱ እሁስ አመዕነኖህን ቤሉ ኣዱንያ አል ቁለኖሁ አዬት?

መሲህተኔሃ መስከረሞ ጠወ

6 መሲህ ኢስ አሜቸሁ ዊ [ጥምቀቲንትለከ መስቀል ሬሆ ቁጊንት፤ እስ አሜቸሁ ጠለዕል ዊን እሁዕነ ዊንለከ ቁጊንት፤ ካን መስከረኖሁ መገንዩ እያን፤ መገን እያኑ ሀንቅያን።

7 ሰሱ ምስክሩ ዮኡ፤

8 እስን ጠሊሊ እያን፤ ዋሃለከ ቁጎሃን፤ ሰሱንኩ ምስክሩ ኢተቀንታኡ።

9 ነኡ መን ምስክር ኣእኖም ጎሬ መገን ምስክሩ ጉዕሚቸን በተኣኖሃን፤ ምስክሩንኩስ መገኑ ቤትሰተኔሃ መስከረኖ ጠወ።

10 መገን ቤቶን አመዕነኖህኒሃ ቀልብስ ኣዜን ምስክሩ ዮሰ፤ መገኖን አመዕንበ መንቹ መገኑ ቤትሰተኔ መስከሮ ጠዋን አመዕንዮበእቤቹሃ ሁኩ መንቹ መገኑ ክዝበኻ አዕዮኡ።

11 ምስክርነቲንኩስ መገኑ ዘላለም ሄኡ ኣሰገለከ ሁኩ ሄኡንኩ ቤቲንከስ ሄኡስ መስከረኖ።

12 መገን ቤቱ ዮሰ መንቹሃ ሄኡ ዮሰ፤ ጠው እኮጎሬ መገን ቤቱ ዮሰበእ መንቹሃ ሄኡ ዮሰበእ።

ዘላለም ሄኡ

13 አዕኑ መገን ቤት ሱዕሚን አመዕንቲንተሩ ጉዕሙንኩ ዘላለም ሄኡኖ ሄኡ ዮህኔሃ እሁስ ደጎኖተ ከተቦንክዕኔ።

14 መገን ብሬን ሆንጠንኮተ ዮኔ መለልመት ከኒት፤ መቱርቹሃ እስ ሃሽኣቶሰገ ኡጭኖም ጎሬ ሞጮጨኖ።

15 ነኡ ኡጭኖምርቹ ጉዕመንከ መገኑ ሞጮጨኖ፤ ደንጎሚቹ እሲቹ ኡጭኖምርቹ ጉዕመንከ ኣእኖምገ ደንጋም።

16 ሀኩ መንቹሁ አመስቤቱ ሬሆተ ኢልሰበ ጨብ ኣእን ለዕዮሰጎሬ ዱኣ እኡን፤ ጨቡስ ሬሆተ እልሰባሃ እኮጎሬ መገኑ ፌሰኖስ፤ ጠዉ እኮጎሬ ሬሆተ ኢልሰኖ ጨቡ ዮኡ፤ ህትናም ጨቢሃ «ዱኣ እኡን» ያንሰበእ።

17 ሂላ ሆጉት ጉዕሙንኩ ጨብሃን፤ ጠዉ እኮጎሬ ሬሆተ እልሰቡ ጨቡ ዮኡ።

18 መገን ቤቱ መሲህ ኢስ አገረኖቤቼሃ መገን እለተ እኮሩ ጉዕሙንኩ ጨብ አታበእገ ደንጋም፤ ሼይጣኑሁ ኡለኖስበእገ ደንጋም፤ *

19 ነኡ መገንረ እሁኔ ደንጋም፤ ጠዉ እኮጎሬ ከን ኣዱንያ አል ጉዕመንከ ሸይጣኑ ጠቅኖሰ።

20 መገን ቤቱ አሜቸገለከ ነኡ ሀንቅ እኮ መገኑ ደንጎተ ሰውየኖ ቀልብ ኣሴኔገ ደንጋም፤ ነኡ ሀንቅ እኮ መገን ኣዜንለከ ቤቲንከሰን መሲህ ኢስ አዲን እሲን ሀንቅ መገኒን ሜጦመት ኖኔ፤ እሰ ሀንቅያ መገኑለከ ዘላለሚሃ ሄአኖሃ ሄኡ።

21 ቱሱ ኦሶ! ሸርኬን ሰገዲቶ ገዉክዕኔ አገዕርዬ።

* 5:18 መት-መቱ ግርኪች እንክለንቶሩ ከኒች ዋሮን የኢሃ በርግታበእ፤ ሁኩንን መገኒች አለሞሁ ጉዕሙንኩ ገውስ አገረኖቤቼሃ ጨብ አኣኖበእገ ደንጋም፤ ሼይጣኑሁ ኡለኖስበእ።

ሃዕር ወኣድ መጻፈ**Alaba-K'abeena: ሃዕር ወኣድ መጻፈ (New Testament)**

copyright © 2025 The Word for the World International

Language: Alaba-K'abeena (Alaba-K'abeena)

Contributor: The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-04-26

PDF generated using Haiola and XeLaTeX on 25 Apr 2025 from source files dated 26 Apr 2025

740fd658-7c09-56dd-a374-995d21c2d66d